

四庫全書

集部

欽定四庫全書

集部

吳文肅摘稿卷一

詳校官監察御史_臣曹坦

中書_臣劉源溥覆勘

總校官中書_臣朱鈐

校對官原任編修_臣勵守謙

謄錄貢生_臣黃嵩齡

欽定四庫全書

集部六

吳文肅摘稿

別集類五

明

提要

臣等謹案吳文肅摘稿四卷明吳儼撰儼字克溫宜興人成化丁未進士官至南京禮部尚書謚文肅正德初儼主順天鄉試以為臣不易命題為劉瑾所怒以飛語罷去瑾誅乃復進用其程文今在集中存其事也其集

初藏於家至萬歷甲申同邑王升武進莊煦
及其從孫達可為選而存之其孫士遇始刊
板故名曰摘稿史稱儼性方嚴操履清慎為
文章莊重簡古詩詞清麗可諷今觀所作當
何李未出以前猶守明初舊格無鉤棘塗飾
之習其才其學雖皆不及李東陽之宏富而
文筆春容詩格亦嫺雅往往因題寓意不似
當時臺閣流派沿為膚廓雖名不甚著要與

東陽肩隨亦驂之靳也乾隆四十二年九月

恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

吳文肅摘稿卷一

明 吳儼 撰

五言古詩

送高舜穆宰瑞安

嘗聞陶隱居燒丹白雲嶺所志在神僊不落死生境至
今嶺邊人相傳事幽屏出門見縣吏退避匿形影君今
往治之順俗須清靜勿求上官知而乃事威猛威猛民

不堪舉目視前甯譬如汲淺井不煩用修綆又如煮小
鮮不煩用牛鼎鼎大火易燔綆長勢難整清靜兩言中
味之覺雋永

題畫屏次國賢韻

少年誦詩書心恒慕伊周蹉跎成老大白髮上我頭作
羹不為梅濟川不為舟金馬石渠間強陪英俊遊去年
歸故山幸得兩月留坐石聽啼鳥持杯發清謳豈敢肆
雄辯萬物移春愁自從到京國仍懷杞人憂故山不能

見畫中容可求

長橋跨蛟溪青山繞四周聞君年少時扁舟泊溪頭臨深戒
在心坐卧不出舟於今二十年乃復思追遊追遊不可得官
職相牽留溪上採蓮曲山中採芝謳採芝貴及春採蓮貴及
秋秋無蛟龍害春無虎豹憂二者不可兼問君欲何求

譽竹

勿謂吾竹瘦竹瘦形乃奇潛龍月下影老鶴風前姿雲
丘有帝竹其種舜所遺一節可為船維楫將安施況我

未眼見傳聞猶可疑何如此瘦竹真作俗士醫挺挺若
骨立森森如直鰭萬古孰同節西山饑伯夷

靈壽杖為羅進士父賦

嘗聞靈壽杖似竹還非竹天然合尺度而自有節目漢
庭賜孔光不稱三公服今歸羅隱君始脫泥塗辱暫曳
過崕峒終携入盤谷扶顛與持危要不藉僮僕赤藤苦
不堅桃竹頗類俗草木若有知安能不羞縮但恐君力
強棄置倚牆屋蛟螭見光怪雷電時相逐

題陳明之畫桃

蟠桃在海中去此幾萬里西橫一枝來纍纍生九子九
在易之陽一乃數之始從一至百千其算猶未已陽雖
有老少中各含生理祝壽更祈男畫意或如此

湘水飛雲為徐廷用主事賦

湘水有白雲飛飛無定止朝從水東生暮向水西起東
西浩無涯要不離湘溪游子長安去湘八千里望雲
雲不知吾寄吾思耳他山豈無雲吾親不在彼湘水豈

不遙白雲長戀此朝暮望不休變化安可擬或薄如輕
綃或積如結綺或碎如衣穿或亂如旗靡或如鳥翼張
或如魚鱗比或如馬脫銜或如車就軌或如神仙人冠
服盡竒詭或如禮法士弁冕而端委郁郁復紛紛千里
猶尺咫高山不礙目況乃隔城壘願言借長風吹我渡
湘水長風軟無力不能移步跬願言隨飛鴻直入湘雲
裏飛鴻有長翮我乃無短羽望之若可親即之又不邇
何日得依雲不以望為喜我作飛雲篇聊以代陟屺

贈決姪

家有二頃田負郭仍膏腴城有五畝宅繞屋皆桑榆客
來一斗酒不則飯一盂僮奴足使令而不親樵蘇高眠
日晏起州縣無追呼試問舉族間盡有此樂無

國賢示和陶止酒詩因次其韻

吾飲苦不多不待戒而止止不在多言戒在方寸裏五
斗可解醒古人給妻子不飲固鮮歡劇飲亦何喜從容
五七行客散主亦起飲與不飲間乃自有至理獨醒似

絕人沈湎必傷已有德以將之庶幾其免矣糟丘本無
山酒池焉有涖不醉不醒人寥寥百千祀

國賢再和以止酒意出楊太常復用韻

和陶復和陶止酒亦云止君不慕子雲胡為相表裏太
常日日齋以禮拒妻子君不屬禮官胡為共悲喜紛紛
止酒人暮止朝仍起不如吾少飲終亦無醉理文士多
尚同達人惟任已趣舍既殊途發言斯異矣吾嘗夢醉
鄉曠遠無涯涘世復杜康家不廢劉伶祀

送凌志學

君性巧過人乃自謂養拙豈惡人間世紛紛學姦譎行
拙常欲方言拙常欲訥出門拙何為不學事干謁北窓
日高眠詩書自怡悅文格不隨時自咲肱三折竭來試
校職就補贊皇缺但得祿代耕莫問官冷熱況此函丈
間論議皆時哲春乘帳下風夜立門前雪豈無惡巧者
為拙傳衣鉢

竹居為子雨父賦

結廬在深巷瀕水仍栽竹豈無間隙地可種奇花木惡
彼競春妍愛此凌寒綠主人好藏書架插三萬軸挾冊
就清陰自課諸郎讀業成獻琅玕萬言猶未足殺青日
無虛坐見長林禿

送王成憲分韻得帶字

王君名真愚惡世多狡獪千金為卜隣喜我愚相類彼
此兩忘形送迎嫌瑣碎客或不具冠主亦不束帶有時
呼濁醪對酌取同醉殺核隨有無盤飧戒奢忤古人縱

真率要不過吾輩君今別我行拂衣何絳繚豈憶秋江
寒鱸肥正堪膾樵李有青襟一一待品裁既無州縣勞
亦鮮簿書債教育得英才君心豈不快嗟我愚無徒獨
行恐招悔賸馥與殘膏何由復沾丐臨岐對樽酒不飲
發長嘅

送徐三母舅

我觀天下人一一皆有母獨我無母兒少小依諸舅竭
來幸長成恒不侍左右微官遠鄉閭薄祿戀升斗舅從

江南來出迎急奔走扶掖上高堂百拜九頓首開樽呼
小童具饌命新婦嬰兒喜牽衣效我前為壽豈是骨肉
情天然知所厚歡聲動比隣自卯飲至酉人生百年中
此樂良不偶舅呼我來前我樂汝知不見汝猶見娣意
豈在樽酒樂極翻成悲又恐別不久飄風吹薄衣斜陽
掛衰柳恨無魯陽戈匆匆遽分手昔日渭水陽今朝潞
河口世異情不殊所乏惟瓊玖

除夜喜丁生餉酒戲用東坡饋歲韻呈景鳴汝礪

結髮事詩書常以酒為佐買書不論錢得酒寧復貨書
多酒滿缸不慕官職大天寒研生冰飲劇餅屢卧光陰
箭脫弦豈但蟻行磨不飲復不吟落莫可能過送酒兩
隣翁對酌相賡和

送董訓導思學

董子漢大儒正誼不謀利君為幾代孫家學尚未墜下
帷誦詩書世事不挂意焚膏補日力汲汲求道義先達
每指云是必清廟器安知古鼎彝不粥今市肆計偕來

京師再就彤庭試拜官復儒冠刀筆恥為吏月俸縱云
薄尚可供糗糒何必公與卿然後可行志吾知函丈前
亦自有公事師生論議中豈獨在文字八閩善人多春
風應遠被象賢古所稱知君諒無愧

次匏菴先生版屋韻

達官宜高居胡為喜卑下豈是三命餘動欲循墻者天
予固甚豐自取恒欲寡何必大厦成而後虛三瓦無梁
架棖題無牖飾丹赭惟有牕隙中尚能通野馬鬼瞰非

所憂客來可延坐看雲數捲簾看月疑乘舸溫燠不知
冬通明復宜夏有書常滿床有酒常盈尊自讀仍自斟
高情還自寫豈無數仞堂得志弗為也

處默為姚廷佐

鐘聲非不宏不扣常不鳴靈雞本司晨暮夜乃無聲自
鳴鐘不祥夜啼雞遭烹在物尚如此況為物之靈處世
有至道片言不可輕興戎與階亂聖訓何昭明十語九
中理一失禍所生所以不如默終身安且榮仰觀卷舌

星俯誦緘口銘直欲效瘖瘂匪但守如餅

浴鳧

僊人王子喬舊賜上方履雙雙化飛鳧翱翔雲霄裏吾
鳧居水中隻影相比比春風楊柳堤秋月芙蓉渚新蒲
細藻間浮游復容與朝在河之洲暮宿渭之涘孰云兩
脰短竟不致千里天然性好潔日日浴不已非是惜奇
毛不屑受泥滓彼為稻粱謀啞喋禍所倚吾自愛吾鳧
網羅知免矣

齒落

我年六十一已落第三齒若更活數年所存知有幾剛
風著唇吻利與劍戟比豈待入腹中而後疾病起譬若
建重門一扉常自啟外侮窺其間孰禦而能止又若築
長堰隙穴不容蟻今已決尋丈不竭安肯已或言死與
生其機不在此不見張相國齒盡乃食乳髻鬣若編貝
或有短折死此雖釋吾憂終焉非至理齒落竟何悲不
落亦何喜但願不腫痛叫號動隣里食物有所妨肴核

宜棄置朝夕啖粥糜其味固自美出言有所妨對客宜
少語況我之所病正在傷煩易憶我初落時掩口含羞
恥只今落已慣與不落相似作詩記歲月亦漫戲云耳
同白巖諸公清涼寺避暑

寺出高城上已與塵世隔誰知眺遠人猶恨高未極
茲西北岑擘衣思峻陟初遶東岡行相顧戒勿亟叢篁
夾疎松蒼苔封斷壁捫蘿心尚恐踏磴足屢仄登頓自
忘疲攀援誰所迫山腰若稍平欲坐恨太窄倚樹憩重

陰於茲休足力回頭瞰其下黯閣深莫測恍聞風雨聲
疑是蛟龍宅排雲更直上從吏不能掖藤蔓直垂肩巔
屹低礙額倏忽至絕頂一覽千峰碧始覺宇宙寬八荒
無畛域不知上去天還有幾千尺長江地底來祇見一
線白豈是禹鑿餘抑乃巨靈擘不然混沌初融液已無
迹風卷白雲飛山銜紅日昃星斗懸碧空一一手可摘
飛蓋結層軒翬翬若張翼持杯復高歌沈思還對奕豁
我千里眸愈我煙霞癖且勿論廢興俯仰懷疇昔

從軍行

驅馬出長城天寒日色薄四顧寂無人黃雲暗沙漠疆
吏為予言雲中兵屢黷近入陽和川縱橫恣殺掠少壯
悉奔逃老弱填溝壑安得用韓范驚彼心膽落昨聞大
將軍自比衛與霍張燈召賓御置酒縱蒲博誓封狼居
胥單于隸蕃服此意豈不佳恐遂成疏略棘門荷戈者
兩手凍如束雪深饑不餐冰堅渴難鑿靖邊未有期凱
歌何日作欲歸歸未能未信從軍樂

送陳子居主政天津收糧

粃粃海邊庾積粟半紅腐每歲猶轉輸道路日旁午簸
揚隨沙塵漂流任風雨辛勤千里來輸十不得五田家
米如珠官倉賤如土豈是入官人不知作田苦今日好
分司豈弟民父母為國仍為民豈徒為小補

送李德崇

一別二十年顏面尚如舊豈惟不改顏長貧能固守自
烹陽羨茶旋酌金陵酒聊以叙契濶為問當時友半死

半漂零所餘惟某某增予感慨懷停杯復低首翻思天地間萬物無不朽人比物雖靈安得與天久棄置且勿言君姑酌大斗

題畫

青青百尺松下有一畝陰南風吹松枝拂我膝上琴一彈猗蘭操再鼓白雪音餘響入松去枝頭作龍吟

寄劉東山五首次國賢韻

去冬天苦寒平地一尺雪長安百萬家十五告糴絕誰

起劉司徒慰此民望
觝莫學謝東山
令我心愁結

東山歸東山
東山今益高
荆薪煮白石
心逸亡身勞
清風不用買
明月時可招
今日靖節翁
何必仍姓陶

雅志在山水
所至輒搜奇
君山十二峰
高深孰似之
一峰留一月
周游歲為期
山花與山鳥
相熟亦相思

東山有耆叟
古貌復古心
古人不在今
今孰為知音
解冠掛神武
歸來卧山林
白雲似相逆
英英起前岑

白日未云暮
青春先獨歸
采蘭以為佩
采荷以為衣
釣

魚不設餌况復為釣磯鷗鳥與公狎知公本無機

月下絲桐為閻大叅作下二首同

琴操古且澹殊無悅耳聲所以世俗人紛紛喜秦箏秦
箏雖悅耳安得如琴清對月一再鼓庶幾姮娥聽

藥圃晴耘

春初雨力肥藥圃發生早誰知百藥中亦自有惡草草
性易滋蔓藥苗易枯槁去草勿去遲趣此日杲杲

平蕪曉望

懷古視平蕪嘗聞少陵語今公復有懷所懷在何許前
望龍盤山道路修且阻草木鬱蒼蒼獨不見伊呂

五言絕句

東莊十八景為鮑菴先生賦

東莊在東城宛似江村裏翠竹護茆簷柴門映流水

右東

莊

菱頭初刺人菱葉已零亂試問采菱歸作蔬還作飯

右菱

濠

主人愛此君手植三十畝明月落空庭清風來短牖

右竹

田

地僻人踪少溪深樹影多遙看泊舟處斜日曬漁蓑

右南

港

樹影連村暗荷香隔岸聞移舟向南浦驚散鷺鷥羣

右北

港

雙井何人鑿村名今尚存試看欄石上或識漢文園

右雙

井村

稻畦如矩方畦疎收亦寡從知道人心不是喜圓者

右方

田

春暖蠶初浴柔桑綠未勻小姬持酒果來祀馬頭神

右桑

洲

細雨紅初熟薰風綠滿林采時留幾顆明日飼山禽

右朱

徑櫻

上岡振衣塵下岡恐還有不識岡上頭能容結茅否

右振

岡衣

流水縈林外迴波繞檻前天光與雲影不得直相連

曲右

池

垂楊夾古岼容我寄輕舸莫向江湖裏驚風挾怒濤

艇右

浜子

青青丘隴上曄曄紫芝芳衆草驚秋色雲根不著霜

紫右

丘芝

仙桂從誰折橋名是處傳人言吳季子家住水東邊

折右

橋桂

家近神僊宅蒼松一徑遙間來弄泉石無意問參寥

右全

真館

古人已云徂今人思繼武應知後來人要以今為古

右續

古堂

日暮荷鋤歸就此軒上息西疇猶未耕遲我養餘力

右畔

息軒

煦煦依浮藻遙遙避釣鉤濠梁隱君子知樂不知愁

右魚

樂亭

寄儔弟

故國青山好春來夢不真去家雖太近猶是未歸人

題陶知州菊莊

愛菊因投紱柴桑亦任真誰知千載後復有姓陶人

聞李健齋斫牕前雙桐詩以唁之

斫却青桐樹牆根自少陰流金日應鑠何物助清吟

題扇

茅屋藏深樹柴門對遠山主人多不出杖屨得常閒

五言律詩

宿安平驛

昔年逢險厄今夜宿安平
流水船前過微風樹底生
入雲孤鳥影隔岸一蟬聲
追憶牆傾日中宵夢亦驚

集天趣園二首

高丘構華屋物理近人情
止水留雲影微風度鳥聲
委泥花有恨匝地草無名
欲試登山屐崎嶇路不平

愛客頻移席張筵復傍池
酒行常引滿坐久不知疲
風

動花增媚雲開石獻奇休文才最富無藉雨催詩

游觀音閣二首

石壁臨無地江流激有聲
檣烏依岸宿水鳥避人行
日度松陰轉風來暑氣平
要知形勝在歷歷問山名
極目江波濶驚心沙岸摧
倚巖誰構閣斷石自封苔
水鳥隨潮去風帆逆浪來
江山千古恨盡付掌中杯

寄堵樂耕

兩地無千里誰能憶舊遊
李邕歸北海徐穉卧南州
月

出微雲斂風來宿雨收
羨君雙足健獨上水西樓
路僻書難寄官閒客亦稀
卧聽黃鳥弄竚看白雲飛
月暗燃藜杖風輕換葛衣
南來纔一月無日不思歸

贈瀚姪

白屋無遺業青年自立家
衆皆稱汝儉我獨惡人奢
客到惟供茗春來不種花
有田仍負郭著意樹桑麻
春夜寒猶峭門前雪更深
老子嘗獨坐謝子遠相尋
共說耕田樂能諳聚族心
大家聊自足何用積黃金

新春寒甚雨雪連日艱於行路瀚姪省予南都八
日而後能至其勤甚矣侍間因問羣從治生之道
歷歷為我言之且為一二好游者
憂其用心不亦厚乎因賦此以贈

送引之黃門兩廣勘事

一別成萬里此懷良黯黯鳥聲人語雜山色水光連禦
瘴常攜藥調琴更解弦清風盈兩袖千古激貪泉

送程瑤

一夕金風動飄然振客衣自知穉尚早又逐燕先歸水
落江流急天寒樹影稀獨憐城上月不減舊清輝

別春

九十春光盡如君惜別何樹頭花片少林外鳥聲多撫
景頻移席怡雲獨放歌明年知此日還向客中過

次師惟明韻

西湖岸東畔上有故人居會數常憑夢情真少寄書直
鈎聊作釣大澤豈憂魚試問寒潭月年來虛不虛

聞三弟移居城中喜作

城郭依青嶂門牆帶碧流出遊無十里來往有孤舟鰕

菜隨時具詩書不遠求已聞開小閣何必更高樓

書李時馨扇

初夏天猶冷疎簾日漸長讀書窮壺與問字識偏旁對
案常忘食樞衣屢上堂取青如拾芥老我有餘光

題沈克寅扇

功名無捷徑學問有階梯夜寢常看月晨興每聽雞要
從年少日思與古人齊老我猶看鏡衰年更噬臍

題林廷振扇

前舟泊沙汀早發不相待岸口樹陰多天邊風色改撫
几對青山何須更滄海同時採珠人今有幾人在

北望

煙火千家瘴霜風十月天羣臣不從駕八駿自巡邊日
落孤城遠雲低朔漠連翠華何日返黔首得安眠

朝天宮習儀回道中口占一首

翠華前日出戎輅幾時還綿蕞依窮塞蒿呼出遠山雲
迷青瑣闥月照玉門關漢檻嶙峋在憑誰許一攀

船牕對月

船牕看月出光彩射人眸
水底魚龍避林間魍魎愁
影分雲外樹波動驛邊樓
五月江湖上蕭然似早秋

送李司徒

南國佳山水息息未遍遊
棲霞聊試屐靜海暫停舟
道梗誰能進身輕不用憂
勸公無入險一月住揚州

送萬生潤

至日關將閉明朝客欲歸
一身依棘寺百里問庭闈
水

落溪聲靜霜寒樹影稀故鄉如問我老病不勝衣

聞渡江諸親遇險驚歎有作

記得江頭別怱怱又一年船開官渡口帆落寺門前不
守垂堂戒翻思彼岸懸近傳消息到令我意茫然

送唐黃門

國計勞神算邊儲輟從臣回頭青瑣近隨路綵衣新
庚嶺風迎節清湘月照人此行成萬里樽酒莫辭頻

寄王子麟潘惟喬

金人四庫全書
卷一
扁舟君送我恨不送君還雨過添新水雲飛戀舊山客
牕長畏病宦轍幾能閒雙騎何時到秋風為啟關

次鮑菴先生煨橘韻

白雪枝頭葢黃金葉底團既疑為火齊復認作冰丸
冷熱隨時改調和適口難爐中方就灼掌上復傳看
軟比雞頭肉圓如鶴頂丹瓢虛還可剖核小豈容
鑽追念致來遠還憐味帶酸殷勤重鄉味常貯水晶
盤

七言律詩

元宵應制二首

一年好景上元多又送春聲到踏歌燈照九衢通禁苑
月明雙闕近銀河虹橋影裏龍旗動琪樹陰中鳳輦過
歡樂不忘民疾苦皇華遠近布陽和

玉宇瑤樓入望賒五雲長護帝王家魚龍出沒燈前戲
桃李芬菲火底花鳳吹聲低風力細雲和奏罷月輪斜
兒童未識昇平象咲指祥光作曉霞

國賢憲副見寄次韻二首

留都無處不堪游何獨雞鳴與覆舟
澹澹煙籠淮水月疎疎雨送秣陵秋
城邊好景看將遍野外荒祠弔未周
已約詞林諸老宿肩輿九月上牛頭

散地偏宜著菲才清時誰合過江來
庭前趁雨移松栢屋後先秋去草萊
紀德謾尋前代石讀書還憶舊時臺
故人相去無多路時見虹光燭上台

聞石田遊荆溪欲觀予所藏小畫以詩迎之

畫船未泊五雲溪，信息先傳滿邑知。
花漸飄零愁置酒，鳥猶啁哳苦催詩。
莫憂震澤波濤濶，須信南宮筆畫奇。
自掃水邊山下路，候公杖屨欲追隨。

次石田觀畫韻

錦標玉軸家家重，任耳人多任目稀。
鑒藻要知顛末在，丹青只論古今非。
山居幽寂柴門迴，溪渚蕭條野鷺飛。
忽憶平南渡江日，倉黃七帖尚藏衣。

石田詩祇言畫而不言書故未句及之

予莊晚步

扶筇閒步洛橋東
水色山光迥不同
黃鳥引雛青嶂外
綠楊倒影碧波中
分秧日近愁無雨
刈麥時來喜有風
造物可隨人意變
較量笑殺兩隣翁

和楊少宰學子韻

屋頭不用聽靈鳥
聞得家人笑語呼
夜半燈花長一尺
朝來日影射雙弧
藍田種就連城壁
滄海生成照乘珠
家學淵源知有自
勿愁參魯與柴愚

送周生楷

千里尋師到石頭思鄉忽上仲宣樓道逢二鳥人爭羨
賦就三都志未酬江上芙蓉花試雨岸邊楊柳葉驚秋
歸帆好趁東風便昨夜高堂夢遠遊

送李府丞乃兄某

新年莫恨客中過未有春風到薜蘿池草自成非夢得
塞鴻行斷奈愁何今宵對月同尊酒明日中流起棹歌
千里相思定何處夜深獨卧翠巖阿

次東園先生除夕韻

爆竹聲殘夜未央
六陰極處轉三陽
羲和自有無窮意
鳳曆因留不盡行
去國兩年猶昨日
縣家百里亦他鄉
換符祀竈聊隨俗
自歎閒官反學忙

送馬太守還任

兒童竹馬候江邊
行路人歌太守賢
淮海兩垞皆赤地
合肥一郡自豐年
甘棠樹底還聽訟
綠柳陰中復課田
太史續書循吏傳
芳名合置李離前

次東園先生齋居韻

東園新竹有新居五月長齋此屋廬

先生不出五月矣

畫省喜

瞻紅日近碧山悵望翠屏虛心存國計紆籌策道在吾身任卷舒賓客到門俱有意案頭勿著絕交書

次東園先生春雪韻

雪花如掌暗長衢綠樹粧成白玉株屬國一心惟在漢將軍中夜已平吳忍寒獨立堦前鶴攫食羣飛野外烏
凍硯連朝未消釋詩翁莫恠有新逋

送孫少卿

殿頭供奉老鴻臚心欲求閒過舊都月請俸錢真不薄
春游山水自堪娛禮成為奏三年績家近渾無百里途
明日玉堦仙仗外也應隨衆效嵩呼

哭太皇太后次鄭亞卿韻二首

地維將缺莫能支哀詔函封下玉墀任如德音堪繼績
高曹家法可差池外廷不與當時政中壺還留舊日儀
夜夜長秋宮裏月清光慘澹似凝思

萬金方藥竟難支臣庶悲號望赤墀長樂春歸花滿地
影娥人散月當池一朝奄棄三宮養百世長存九嬪儀
聖子神孫哀罔極春來秋去不勝思

環山樓為陳太僕瑞卿作

滁陽新起見京樓樓外青山遶四周春意自催禽鳥樂
浮雲不記古今愁樹籠月色千家暝松度風聲萬壑秋
莫道諸峰能掩閉舉頭西望是皇州

壽包太守父八十

池陽太守年六十猶有八旬翁在堂白髮還為稚子舞
斑衣自學老萊裝松高百尺根如鐵菊至重陽花更黃
遠我不隨賓客後雙溪同進紫霞觴

送韓司徒

君命臨門不敢稽歲朝就道尚嫌遲春風前引朝天佩
冬日還留去國思西北軍興常告乏東南民力又堪悲
司徒自有生財道誰謂時艱未可為

挽伏羌伯

竹帛曾書大將功百年威望重西戎戰酣塞上雲連地
敵退轅前草偃風禦侮自來三策在殺身曾有幾人同
至今血染山頭石雨洗年深色更紅

壽林廷振

平市街東第一樓主人雖老尚風流六旬下壽明年是
十二同庚與宴不歌吹忽驚梁上燕起居無藉杖頭鳩
鳳雛相載來江右一笑能消萬斛愁

壽都景章八十

已到磻溪感夢時何心更慕帝王師曾逢仙授長生訣
每遇人吟遣興詩囊裡有錢堪買酒鏡中無髮可成絲
高年誰似翁強健日日登臨力未衰

次呂太常賞牡丹韻

淺紅深綠自相承妝靚何勞粉黛凝種自洛陽城裏乞
詩從長慶後來增若誇國色應無敵欲殿春光恐未能
只此尚嫌花富貴不須更染碧金稜

侍家君遊牛首登兜率崖次青谿韻

老大登臨興尚豪
遠隨杖屨竟何勞
道傍雨洗松根瘦
樹杪雲連石筍高
僧愛孤虛新起閣
鳥嫌峻極不營巢
為休足力頻思坐
欲問青天首屢搔

次前韻荅呂太常

公負詩中一世豪
朝吟暮咏未言勞
衰年莫作青年看
小隱還輸大隱高
夜靜燈殘蛾撲火
春歸花落燕爭巢
細評物理應長歎
短髮蕭蕭不耐搔

送魏都憲

奉勅江南僅兩年蜚聲已達冕旒前何人為補中丞缺
此日還將舊政傳貪賄吏驚先解綬弄兵人散欲畊田
願公為國持三尺一歲官應見幾遷

送邦彥學士先生二首

散地偏於懶性使我來君去思悠然出門是處成三昧
視日何人記八甌夜靜月移花影亂春深風度鳥聲圓
而今每憶當年樂始信瀛洲別有僊

朝陽門不比春明別遠無過是兩京名姓尚留東觀在

官衙不減北扉清
船從白鷺洲邊過
馬向烏衣巷口行
冠蓋幾人來送別
獨予南望不勝情

沙河道中次周檢討韻

微風無力可飛沙
天氣如春自可嘉
勒馬問途將幾里
入門留客是誰家
魚灘淺水初合射
雉林深日漸斜
遙望萬山環拱處
六陵尚有五雲遮

謁劉諫議祠

蕭蕭風木古祠前
千載英靈尚凜然
銳意一言能悟主

金匱要略卷一
豈知無力可回天
寒蟬抱樹何由化
凍雀爭枝未肯還
溪澗絕無蘋藻在
不妨一勺薦甘泉

西望泰陵恭賦

北斗杓西是泰陵
小臣瞻拜淚填膺
功高堯舜曾無忝
道在詩書可並稱
遐密豈知聞四海
太平何必見三登

詞林老宿心思竭
欲繪乾坤恨未能

時修實錄
未成故云

回至清河小憩

風靜雲開天日晴
草平沙軟小輿輕
蒙蒙茸虛有狐裘在

蹀躞時聞馬足聲，賣藥僧歸山麓去。
負薪人避道傍行，倦來慙憩清河側。
折足鐺調骨董羹。

和石學士予莊韻四首

招隱何須賦小山，杜門更欲建重關。
采菱歌落雲煙外，打麥聲來咫尺間。
昔日種成松老大，清晨放去鶴飛還。
道人本是心無事，較雨量晴亦不閒。

長饒不用斲蒿萊，數月渾無一客來。
帶雨初移庭下竹，試花又見臘前梅。
月明松逕隨山轉，岸仄柴門逐水開。

莫道白雲飛不去有心長護讀書臺

鏡裏叢叢白髮新癡心方且學修真論文客到常辭出
問性人來不厭頻短牖南頭修竹譜曲闌東畔酹花神
夜深篝火尋芝朮勉強支持此病身

矮屋低牆草樹平百年別業喜初成滿頭白髮猶忘老
對面青山不記名行路喜逢田父罵出門恠有野人迎
春禽何與農家事布穀聲聲為勸耕

艤舟蜀山候沈石田晨起聞已過悵然賦此

自到衰年常懶出終朝何事坐江干
蘭漿桂橈留黃漬茗碗薰爐對蜀山
無奈寂寥呼晚酌可堪風雨作春寒
相迎三日還相失始覺人生會面難

方山送別

遠上方山更土山尋春選勝送君還
故人情重思投轄明主恩深見賜環
車騎漸分斜照裏旌旗猶在萬松間
利名自古誰能脫今日輸君破一關

請柴墟賞紫牡丹

十年前賞舊花欄
幸喜重來得飽看
謾挿藩籬防折損
欲留富貴補酸寒
竹籬無藉青絲菜
畫省應憐紫玉盤
明日花前須盡醉
一番風雨一凋殘

登雞鳴塔次白巖二首

浮屠高倚石頭城
不信慈恩獨擅名
萬里空濛看鴈過
一聲呶喔聽雞鳴
長江細浪添春雨
半壁斜陽弄晚晴
搔首問天知不遠
碧雲深處有人聲

寶輪矗矗倚天高
拾級相從豈憚勞
東望風煙連魯國

西來雲雨失臨臯
煩公倚壁題名氏
容我凭欄散鬱陶
鈴語聽來渾不識
恍疑江外落春濤

復次賞花韻

珍重名花置曲欄
百年能得幾迴看
未開長怕春風惡
載酒還愁夜雨寒
帘幙高懸垂地碧
鸞凰欲下遶空盤
詩人有意來重賞
為語羣兒莫折殘

遷居後涇川以詩見惠因次韻

莫因四壁笑相如
自愧無能稱此廬
避雨暫為終日計

癡兒便擬百年居酒酣夜卧牕前月睡起朝繙架上書
正苦炎蒸侵病骨可堪鳳歷數歸餘

用韻荅白巖

誰說東遷意不如青山重疊遶吾廬可憐京國繁華地
還似江村水竹居蛛網未應封筆硯燕泥偏欲浣琴書
願公廣廈成千萬大庇窮人喜有餘

次荅涇川

每讀新詩意懼如虹光連夜貫吾廬山東羣盜無寧日

海內何人有定居三尺尚存腰下劍一編不廢案頭書
高軒來日能相過玉屑霏霏聽緒餘

送房叅將

父子親曾授六韜十年不試怒衝霄叅戎新沐君王寵
萬里寧辭道路遙潯水月明烽火熄蒼梧雲破瘴煙消
功成會見封侯日宣政門前揀左貂

次白巖韻

江壖潮落水痕深江岸樓高近十尋雲鳥影從牕外度

金匱山房詩集 卷一
水龍聲在樹頭吟空林雨過無三伏石竅風來有八音
自古國謀多野獲不妨乘興數登臨

次白巖西亭韻

橘中妙理不容談簾外青山自可耽
鳥度方塘歸暝樹風吹急雨洗朝嵐
詩章立就公何敏酒令方嚴我不堪
回首故園無百里對人休唱望江南

鮒魚次涇川韻

水族紛紛此獨清鸞刀欲下細無聲
澄江網集波濤濶

深夜人喧炬火明
食指動知嘗美味
澤梁禁在說漁征
膾餘棄擲還珍重
鱗甲支離覺漸生

和鷺湖留別韻

昨夜雨聲先作寒
朝來那復聽鳴鑾
風前莫弄桓伊笛
日下應彈貢禹冠
老去著書猶未晚
病中投綬始知難
人傳藥石言盈耳
尚有囊中未試丹

邀鷺湖過山庄避暑

小洛橋西碧澗長
濯纓不必問滄浪
五湖地濶春無瘴

六月山深夜自涼池面雨浮菱葉亂門前風細稻花香
高旌暫住柴門裏音信何愁滯一鄉

送李亞卿致仕

纔看平寇歸臺省又見投簪出國門報主有心身尚健
論兵無地舌空存青山夢與紅塵隔綠野詞從白雪翻
歸路正當春景暮東風江上落花繁

送嚴州趙推官

百年琴鶴不須携兩袖清風拂釣磯畫靜訟庭芳草合

春深山館落花稀
隣封佩犢人猶在
闔境飛芻卒未歸
安得家家千樹漆
不愁無食與無衣

送列縣丞致仕

行囊不辦買山資
問我先求贈別詩
有子入官心自足
任人生謗怒何為
門前舊種千竿竹
屋後新開五畝池
賓客未來風日好
乘閒獨釣大江湄

雞鳴山和鄧司徒

習靜空山物物幽
出關何必問青牛
閣依巖構如巢小

雲過簷前似水流，斷壁斜陽紅欲斂。
遠峯新雨翠偏稠，雞鳴獨占城西勝。
蓬島徒傳海外洲。

和白巖再疊前韻

山城面面俯長溪，萬古溪流不向西。
鶯逐春風林外囀，鴈歸寒渚雪中迷。
雨晴石上泉聲細，日落巖前樹影低。
老圃不須長抱甕，只今新水已成畦。

壽張司寇乃翁

鸞書昨夜出天扉，八座馳封世所稀。
鐘鼎已非前日養，

斑斕還著舊時衣
雲留咫尺無勞望
壽過岡陵不用祈
堂下有人吹玉笛
分明為奏鶴南飛

壽劉尚寶克柔

留都閒靜獨符臺
散地何煩濟世才
白髮幾年愁遠別
綵衣今日喜重來
銀絲細斫秋風鱸
玉液新芻雪夜醅
千里江山隨處樂
壽筵何啻一時開

次西涯假山韻

秋深病起強登臺
不倩人扶亦壯哉
恠石立當狂客拜

新題還待醉翁來空巖泉落琴初奏斷壁雲生錦未栽
誰道岡巒真是假層層疊疊似天開

觀梅次西涯韻

帶雪移來竹外枝藏深猶恐或傷之百花頭上應先發
二月江南已過時莫向高樓吹玉笛祇宜東閣賦新詩
廣平縱使心如鐵相對寧辭酒滿巵

送田尚書致仕

一朝投綬竟何心愛國惓惓意自深老去身猶依輦轂

春來夢已在山林送迎門外無生客供具囊中有賜金
莫道二疏蹤蹟遠古人還恐不如今

送楊中書代父掃墓

辦裝曾見賜千緡乘傳何煩更問津裡祀本承明主意
出門非愛遠遊人長亭客散車塵暗舊隴春回樹色新
今日故鄉誰不羨鳳池相繼掌絲綸

皋湘書屋次西涯韻為敬所閣老作

碧欄朱檻俯沅湘不比長沙隔異鄉江上水清魚可數

逕邊霜冷菊偏香
鈎簾靜愛青山近
撫卷閒知白晝長
昨夜客牕真夢見
海陽雲樹晚蒼蒼

過歌風臺

項蹶嬴顛四海平
更思壯士作長城
豈知產祿初萌孽
應恨韓彭已就烹
富貴漸生亡國態
英雄偏重故鄉情
風雲不作歌聲歇
日暮惟聞烏雀聲

飲仕弟淮安官署

汝到淮南已半年
汝兄無夜得安眠
須知此會成佳遇

莫恨相逢是別筵
古樹蒼蒼留夕照
斷鴻嚶嚶唳霜天
追思老祖清風在
閭巷歌謠百世傳

和鄭先生病中見雪韻

春愁萬斛幾時消
穀日陰雲自歲朝
逐客正迷秦嶺路
詩人猶記灞陵橋
草根凍合猶含潤
木末花開亦旋飄
忽憶詞林諸故舊
五更騎馬正趨朝

馬先生徙宅戲贈

家具能勝幾兩車
車聲軋軋過前閭
餅罍未卧知藏酒

行李雖多半是書雪後園林春事近夜深燈火客牕虛
忽忙好記魚軒在白髮年來恨獨居

觀史黃門蓮葉硯有感

石蓮不信世人栽太華峰移一瓣來高潔豈為盛酒器
堅貞長傍讀書臺縱然剝落傷全璧猶勝沈埋卧綠苔
寄語黃門好收護玉函珍重莫頻開

一葉芙蓉翰墨香百年故物藉珍藏換驚人去遺書在
瘞鶴銘存舊迹亡承露尚堪毛穎飲含污不恠客卿狂

阜囊疏草常咨爾未敢淹留在玉堂

硯乃宜興王氏舊物其甥張雲翹得之不戒於僕
遂至殘缺既而為友人所給售於毘陵俗子李鐸
無所用又入方莊李氏茲歸與仲黃門此詩蓋紀
實也二十五年前予嘗見之卷中尚有彝齋雲林
諸公往復數書及履道銘一首未刻今
皆零落獨倪過一書存耳可歎可歎

元宵遇雪次鄭東園先生韻

記得前年此夜中觀燈曾入建章宮三千火樹高低見
十里星河遠近通破敵有時思將帥駕虹無地覓僊翁
今宵踏雪街頭去贏得璫瑤襯軟紅

送陳黃門父還閩


白髮新封諫議歸山林巖壑盡光輝
長溪水落灘聲靜
遠岸秋深樹影稀
雙旂清風迎紫誥
滿船紅日照斑衣
天恩浩蕩應難報
早遣僊郎侍瑣闥

送徐二母舅

簫鼓喧喧滿畫船
路人遙指作神僊
居家不必千金產
贍族先分二頃田
雲影倒流歌扇底
燕雛輕拂舞筵前
誰知元舅長相憶
夜夜池塘夢惠連

待曙樓次西涯韻為俞黃門作

樓頭清旭斂輕霏樓下還看過客稀
秉笏有人思待旦
高居無地比凝暉
啼鳥眇眇聲將歇
彩鳳翩翩勢欲飛
今日皐囊無別事
萬言意只在宵衣



吳文肅摘稿卷一

欽定四庫全書

集部

吳文肅摘稿卷二

詳校官監察御史_臣曹坦

中書_臣劉源溥覆勘

總校官中書_臣朱鈐

校對官原任編修_臣勵守謙

謄錄貢生_臣黃嵩齡

欽定四庫全書

吳文肅摘稿卷二

明 吳儼 撰

七言律詩

硯瓦墩為周仲鳴作

孰移龍尾晉陵來
風卷波濤翠作堆
高樹恍疑為象管
薄雲遙認作松煤
春泉不洗千年垢
秋蘚常封數尺臺
形勝眼前人未識
久藏榛莽待君開

和鄧司徒遊神樂觀登醴泉亭韻二首

不學修真訪羽仙
曾將詞賦奏甘泉
畫龍可致千峰雨
養鶴還謀二頃田
厭聽南音歌樂府
笑持野菽薦賓筵

追思四老同遊日
倏忽於今十五年

壬戌秋與王東麓
馬紫巖楊遂菴李

東莊同
遊故云

留都官府似神仙
下馬閒聽石上泉
但得醒心無洗耳
不須問舍復求田
黃鸝避客藏雲樹
翠竹分陰入綺筵
莫道人生難聚首
重遊仍約在今年

同白巖諸公清涼寺避暑二首

城西古刹倚層空，驚嶺東來有路通。
樵唱不知蘿徑外，梵音只在竹林中。
隔江鼓棹人乘月，潯暑添衣客避風。
時周大理增木棉衣故云白髮老僧殊解事，問誰詩句似休公。

古寺遙看入碧空，竹間石徑暗相通。
九重宮闕雲霄裏，千里山河指顧中。
地迴自應消暑氣，樹高偏易起秋風。

翠微

陳後主亭名

舊址今安在，不用殷勤問遠公。

中秋夜與儔弟翫月用西涯韻

誰懸明鏡在中天把酒無從問謫仙昨日雨隨風作黨
今宵人與月俱圓對床已辨留同叔得句何煩夢惠連
弟勸兄酬須盡醉西樓一缺又明年

鄧司徒宅賞菊

折得東籬數種花白衣未到酒須賒低昂鶴頂迎風舞
零落鷺毛帶雨斜龍腦清貞香不散御袍端正色偏嘉
司徒宅裏頻來看何必陶潛處士家

壽賈鳴和乃翁

神仙誰說駐崆峒
頽上親逢百歲翁
語笑不談今日事
衣冠真有古人風
芙蓉花發香猶淺
瑋瑋筵開月正中
拜舞司成年老大
膝前還看作兒童

荷花燈

分明玉井小芙蓉
高蓋亭亭出翠微
暫借東風開紫焰
不愁清露落紅衣
六郎自怪年年熱
妃子應憐步步非
笑殺詩人看不厭
夜深更僕尚忘歸

小圃絲瓜叢生有一蒂
三四莖者園丁以為怪一

老僕獨以為瑞來語予予曰謂之怪者非也謂之瑞者亦非也乃賦一詩以記之

秋圃叢生瓜並蒂我知非怪亦非祥氣鍾此地偶同發
物有何心獨擅場翠蔓出牆風裊裊黃花盈架露瀼瀼
自嗟潦倒無他祝但願兒孫滿畫堂

城南曉行限韻與白巖雙溪同賦

侵晨出郭旋添衣自笑浮生未息機終日馳驅何所事
故鄉咫尺尚忘歸江空月落潮聲小野曠天低樹影微

不識饑鳥底心性避人還欲向人飛

聽鄭伶琵琶

鄭伶名價重江東五百梨園技盡空
子夜猿啼殘月白上林鶯老落花紅
江頭商婦愁無限塞外明妃恨不同
可惜曹綱今去遠何由兩市鬪西風

雪中送李時馨

歲暮天寒朔雪飛故鄉有客苦思歸
據鞍不覺頻呼酒對竈何妨共燎衣
路比山陰清絕似人如東郭履全非

金匱要略卷二
健翁久矣無消息為問年來瘦與肥

送汪海雲

浮溪之後見斯人意廣才高志未伸
愁對落花先置像
喜看脩竹為傳神
輕帆欲去常逢雨
久病歸來正及春
要識松楸須問我
洛橋西畔石嶙峋

夢予莊

夢到山莊自扣扉
山人驚喜主人歸
民饑莫怪牛羊瘦
歲歉誰言地土肥
庭草色回春意早
林鴉聲亂暝煙微

醒來何事猶惆悵水浸磯頭舊釣磯

諭驥兒二首

交游零落少知音驥子須當識我心
盛酒盆埋紅杏底采蓮舟繫綠楊陰
梅開溪上千株雪橘熟霜前滿樹金
終日擊鮮應溷汝行厨多只在山林

眼底何人是賞音老年心異少年心
春深倚杖聽鶯語日午移床就竹陰
倒屣自迎門外客買山無藉橐中金
平生所愛惟柑橘歸日須看綠滿林

用韻贈沈壽卿

吳人相對共吳音，須信儂心即若心。
旅館今宵看月色，故園何日醉花陰。
門前不厭頻來客，囊裏猶存舊賜金。
吟得新詩宜自愛，莫教輕易與鷄林。

拜王司馬墓

海內驚聞早拂衣，白鷗猶道未忘機。
自從禹穴探奇去，不見遼城化鶴歸。
人遠鳳臺春寂寞，月明仙嶠露霏微。
英靈耿耿知何在，應附龍髯左右飛。

遊土山寺用前韻

倦向雙林欲解衣
入門何暇問禪機
叉魚稚子持竿去
賣藥山僧負米歸
松逕月明樵唱遠
竹林風細磬聲微
歸來輿皂心偏急
遙望重門步若飛

飲魏國園亭

臺榭秋深百卉空
空庭惟有鴈來紅
曲池暗接秦淮北
小逕遙連魏闕東
富貴豈爭金谷勝
文章不與建安同
上公亭館無多地
猶有前人朴素風

惲憲副書約春盡會龍江驛

送客時登黃鶴樓江波日日向東流詩人謾道眼前景
老叟空懷身外憂鸚鵡洲邊春草細鳳凰山下暮雲收
故人旌節聞東下借問何時到石頭

乙卯季冬見白髮效樂天體三首

白髮新生豈少恩天教小子漸稱尊一莖便作千莖種
四十將開八十門拔去自家難諱老染來何物可除根
後生切莫輕前輩日月隨君萬馬奔

右喜
白髮

曉來對雪常梳髮鏡裏何緣得上頭豈為作詩真太苦
或因謀國有深憂官叨七品誰言貴年過三旬未識愁
莫是家庭元有種人言今日可憑不

右問
白髮

人生大率百年期四十寧當髮白時祇許頭顱留少雪
可容髭髮盡成絲恒言未敢先稱老壯志安能便服衰
春筍秋禾今已悟東坡兩語是吾師

右止
白髮

除夕景鳴餉酒戲作小詩奉謝

一詩換得兩餅罌文字年來價漸輕潤筆不知金石例

危詞長恐鬼神驚
歲除狂態還依舊
老去浮名敢浪爭
明日衣冠隨萬國
山呼不盡小臣情

元旦醉後與景鳴引之聯句戲東國賢

醉邊倔强妄稱兄
醒後心降氣亦平
藏鹿墮中真是夢
伏尸蝸角竟何兵
暴能不著為長勝
辯到忘言更有情
忽憶木鷄因有得
獨輸全德與隣生

景鳴和章欲任癡名予不敢許復次前韻

低頭真合拜吾兄
兄自無言意亦平
地讓一頭明退舍

予居與景鳴第
相連而退一舍戰曾三北敢稱兵亡誇為有子真妄智
欲成愚子不情擲筆據梧聊假寐令人千載憶莊生

送馬學士

人間何處是蓬瀛翰苑相傳近玉清
蒼蘚階除春雨合綠槐庭院午風輕
安眠竟夕無宣詔讀史隨人有品評
今日長卿仍姓馬又因消渴暫南行

送西寧兵備潘以正

五月霜風卷旆旌六蕃相率道傍迎
只今塞外無烽火

空負胸中有甲兵
校獵平原秋草碧
投壺客舍夜燈明
誰知緩帶輕裘者
自是官家萬里城

送王世賞雲南提學

歸向滄洲近十春
始持憲節出風塵
干將可合理藏久
薏苡何妨謗語頻
絕塞競看金馬客
雄詞驚倒碧鷄神
他年宣室虛前席
應為蒼生訪舊臣

寶應湖阻風

琉璃城闕水晶宮
玉局仙人到此中
便覺鼃鼃忙徙窟

不妨波浪直翻空
隔溪茅店雞聲早
千里家山月色同
明日檣烏幸無恙
莫教深怨石尤風

送充道乃兄某南歸

友于一見即成別
不欲緇塵上素衣
霜信似催鴻鴈去
月明如送鶴鴒歸
官河水合來時路
江渚烟迷舊釣磯
又恐移文先有在
不容重采北山薇

挽周月牕醫者

南來北去任天真
到處逢人論谷神
醫不專門兼老少

藥無定法有君臣讀書牕小能留月種術堂虛尚貯春
愧我獨無遷史筆倉公傳後續斯人

和西涯先生擬卜居宜興韻三首

畫船曾泊舊城陰綵筆親題漢上襟夢卜敢忘明主意
登臨不負壯年心幽并客向沙塵老湘漢人愁草木深
陽羨溪山真不惡即今坡老是知音

一雨商巖萬里陰清時亟欲解塵襟田園有興成前約
杖屨相從是夙心玉在銅官山益潤珠藏罨畫水增深

古來風土同荆楚不用咻咻學語音

莫為槎頭憶漢陰長橋南下可開襟采芝試聽山人曲
伐木應知長者心江夏米無陽羨好巨區水似洞庭深
勿言少賤無知己草澤中間有賞音

用前韻戲東徵伯

五雲溪傍太湖陰不藉三江遠作襟誰說市朝成大隱
要知父子本同心石能攻玉皆為礪水可容舸即是深
何事卜隣無一語疑君未欲聽南音

用卜居韻邀國賢賞雪

密雲千里夜同陰有客相邀話素襟凝結固知由地力
豐登誰識是天心紙牕外借三分白瓦隴中鋪一尺深
五鼎待君同下筯

時新作
五小鼎

莫勞終日聽車音

西涯宅觀梅花

東風聊借一枝春特慰巡簷索笑人花比去年香不改
詩從今日思尤新舊傳傳老能調鼎近許逋仙為卜隣
忽憶故園千樹雪無由獨步大江濱

次敬所少宰贈傅北潭韻

重重烟樹數家村王事何須與客論老鶴風前聲更遠
孤松雪後色長存萬言不盡明公意一飯難忘聖主恩
今日鷄泉東咫尺草亭聊爾寄乾坤

送張亞卿進萬壽表分得秋字

一尊酒餞小瀛洲明日神京拜冕旒雲為從龍歸北去
水因朝海向東流清風到處迎僊旂好雨隨時送客舟
萬口山呼意難盡獨將金鏡續千秋

遊天竺

佛國誰聞有此山

門有佛國山三字故云

幽深彷彿類商顏鳥歸

故道如相引雲起前岑自不閒月落鐘鳴僧入定風吹酒醒客忘還峰頭何處飛來石長鎖松筠第一關

臂痛漸愈次張東海韻

三時臂痛一時瘳冠幘依然又上頭病脫偶逢醫國手功成全藉醉鄉侯

香蛇浸酒故云

鍾山高處凭欄望淮水東偏

載月遊酒思詩情渾不減臨池興復似前不

戲築雪假山次韻

風驅滕六似哀號為恨儂家輦築勞轉日可無雙岫在
礙雲真有一峰高經營意匠輸天巧掩映詩班上髣髯
西蜀雪山誰是假同歸滄海作春濤

送龍致仁主政管間

伯高何但省郎才為有詩名水部來官驛算無千里遠
斗門日放幾迴開深春尚擁藍關雪未蟄先驚夏澤雷
莫為苦吟留過客舟行到此已心灰

諸公以絲瓜詩韻險復賦一首

不向東陵學種瓜偶攜一本自隣家
苞中未見青絲縷架上先看滿眼花
雙實交加垂曉露數莖蟠結掛秋蛇
天寒百卉凋零後老蔓青青更茁芽

次杭方伯壽日韻

梅花長自占先春一度相看一度新
投紋正當垂老日歸家猶是未閒身
雪晴風煖笙歌細弟勸兄酬禮數頻
試問尊前稱壽者幾人穀日是生辰

世卿誦鬪草聯句戲次其韻

懶向東風看落花筠籠摘草戲相誇欲尋指佞無醒醉
直造山巔與水涯色弄青紅根可辨味分甘苦性應差
莫因今日兒童戲便作神農註疏家

示園丁

為我先營養老資青青雙髻欲成絲賞花壯日心猶在
抱甕當年力已衰園小不宜遺地力春深切勿後天時
綠陰如幄花如錦應共佳賓醉玉卮

壽伯舅謙齋翁

甘雨和風遍域中太山喬嶽可論功人思識面多瞻仰
天本無言自感通清淨宛如曹相國純誠全類富韓公
我於元舅無他祝鶴髮年年侍九重

送顧士廉編修父還松江

北來南去幾多時怕見緇塵上素衣斜日城陰千里別
秋風江上一帆歸鱸肥不用思張翰鶴唳誰將吊陸機
莫怪冠裳苦纏縛封章早晚到巖扉

寄師惟明

白晝遲遲玉漏沈
北牕清興在孤吟
半生未試屠龍技
三刖無慙獻璞心
自有文章齊白璧
不須贏索貯黃金
絨書為托南飛鴈
一入青冥思轉深

送郭大尹魯瞻

山陰未久又朝歌
南北民風竟若何
圍帶減緣勤撫字
閭閻靜為緩催科
棠梨花外雙鳬下
楊柳陰中匹馬過
到處喜迎賢令尹
兒童婦女笑聲多

壽楊方正乃翁

笑傲乾坤八十年垂垂白髮映朱顏
高情已在羲皇上遺愛猶存召杜間
清白傳來知有子利名看破覺無關
長生要訣誰能識浪說神仙煉九還

和白秉德寺中齋宿韻二首

蕭寺淒涼月色寒雪消將盡尚留殘
自嗔歲月忙中過暫借楞嚴靜裏看
同舍謾勞虛左席上方誰許建騷壇
明朝又入承明直依舊含香更握蘭

齋閣東西各一方燔柴同見燭天光
南郊本為蒼生禱東作先祈百穀穰
隨世功名成潦倒應人文字恨劬
洛陽盡是紅塵地不信香山獨不忙

仁仲齋居和章盛誇僧寺之美復用前韻戲之

鐵衣自慣雪山寒笑殺詩人覓嬾殘
梵語本空何足聽天花雖好有誰看
北門不信齋無室西域徒聞戒有壇
邪正分明如黑白鮑魚莫誤作芝蘭

送鄖陽太守胡天叙

昔日曾過舊草堂喜聞高論夜聯牀東曹初受司徒薦
南國新分太守章地控三方連隴蜀水流百折到荆襄
中間待哺知多少安得人人粟一囊

寄堵邦寧

碧梧翠竹水雲鄉中有幽人行最方洗耳不教聞理亂
逢人祇自說畊桑春來秉筆修茶譜花發隨時具酒觴
天與清閒渾不識登臨猶恨一身忙

寄任十

而翁與我是忘年我憶而翁願爾賢孝似曾參寧過分
弟如王覽亦當然夜深燈火宜勤學雨足郊原好種田
勿逐少年遊俠伴鬪鷄走馬縣門前

次國賢韻送浹姪

城東水竹有新居盡是前人手澤餘羣從中間惟汝長
百年譜牒至今虛北來暫假朝天夢南去還看種樹書
行役到家應自樂風波渺渺更愁予

壽德輝母某太夫人

近時王母定何居不在瑤池在帝都堦下行厨麟作脯

曲中新譜鳳將雛

時德輝與其子守仁皆在朝

紅顏不假榴花暎健

步何須竹杖扶愛日恩先天假貸青官輟講助歡娛

挽吳汝礪

生為同姓客為隣每愛交遊我獨真字法近從山谷變
詩才惟許宛陵親身嘗百藥猶多病家累千金尚似貧
後日書香知未斷嬰兒風骨已驚人

次守溪少宰夜飲韻

妙句曾題郤曼容

守溪贈行詩有宦况輕於郤曼容之句

至今什襲未開

封袖中懷刺羞頻謁馬上趨朝喜暫逢仕宦心輕今更
嬾登臨興在老尤濃洞庭湖水東山路杖屨何時得遠
從

送蘇伯誠由江西改四川提學馬上作

長空雪霽朔風號送客方知去客勞蜀道莫言今日易
廬山還似舊時高璽書新換增光彩旌節長懸脫羽毛
試看青襟誰最好筆頭滾滾帶春濤

邦彥第四和章不至復用韻促之

詩人不厭六蟲號奴厭詩筒入遞勞東野久知韓子富
老坡獨數柳州高任教勛敵輕鷄肋却喜寒林得鳳毛
凍硯頻烘玄浪湧小奚誤指作溪濤

次仲實詠雪

六花莫認作飛霜足練誰家有許長當年漸踈知避日
迎風不下欲循牆太平有意先呈瑞輕薄何須更學狂
莫與梅花較優劣縱多一出已輸香

送伍朝信省祖

記得嬉遊大父前分甘膝上是何年
朗陵老去思荀或靈運歸來拜謝玄
新製綵衣初試舞舊騎竹馬尚依然
碧桃花下稱觴處更祝靈椿壽八千

挽章恭毅公

回天力仗一封書震地雷霆我自如
海內瘡痍何日起
胷中孤憤幾時攄
狄公直諫安唐室
商皓危言定漢儲
慙愧後公三十載無由一束致生芻

小茅山書屋

小結茅山屋數椽藏書却笑米家船長簷不解蔭歌舞
淨几偏宜閣簡編蝌蚪影涵春雪裏伊吾聲落晚風前
遙看翠竹蒼松外時有虹光夜燭天

挽周尚書

入官已不為身謀壯歲聲名動冕旒執法堅如子定國
活民多似富青州官居廊廟無遺恨老去江湖有遠憂
試問近來諸老宿立朝還有此公不

送鄧生下第

壯歲才名已不羈，儒冠誤子亦多時。
從知照乘珠難售，方信千鈞弩獨遲。
夜雨青燈愁客夢，秋風澤國動鄉思。
何年挾策重來此，折取蟾宮第一枝。

送段惟勤宰新城

龔黃卓魯是何人，千載令人仰後塵。
寧拙催科書下考，莫由捷徑問通津。
公門似水誰嫌簡，馬骨如山始信貧。
三尺待君來執法，觸邪還見薦冠新。

壽大理陳少卿母九十

不在山間與水邊
女中亦自有神仙
種桃直待三千歲
屈指纔過九十年
嫁日舊衣何太窄
滿頭黑髮尚依然
白雲似解賢郎意
片片飛來棘寺前

挽歐時舉次蘇伯誠韻

白髮瀛洲第一仙

同年庶吉士
時舉最長

玉堂閒暇日如年
文興

六一將衰後易究
乾坤未畫前
武帝不知顏駟老
漢廷偏讓賈生賢
可憐才大終難用
祿薄無由滿二千

少年不作探花郎老去功名心更忙
白髮窮愁多夜雨青雲得雋已斜陽
殿前同對三千字門下誰持一瓣香
丹旄飛飛歸舊路旅魂彷彿記吾常

送南京張學士先生

東白文章舊有聲金滕國史誥初成
南都命下新承寵九月秋高始啓行
鈴索不愁深夜警官衙猶帶北門清
石頭城外秦淮口一片輕帆挂月明

壽程宗魯父母

湘流曲折遶長沙百歲巖高石徑斜深靜初疑王母宅
幽閒又道葛洪家堦前袖手調青鳥花下浮觴泛紫霞
回首綵衣千里外楚山時被白雲遮

送守溪乃兄世隱東歸

難弟歸來兄亦歸高堂齊著老萊衣洞庭金橘霜前熟
笠澤銀魚雨後肥伐木有聲來戶牖采薪無伴扣巖扉
山邊水次逢人語莫道長安是與非

送體齋先生省祭

學士歸來掃墓田天風特為舞松杉鹽梅久待調商鼎
版築猶思在傅巖墓左豐碑仍舊額祠中木主換新銜
碧山不是流連地顓望春江挂錦帆

送聚上人還普應寺

鈴語遙遙紫翠間分明為報遠公還龍施法雨迎新檄
雪作天花散舊山淨土未歸飛錫遠清淮初渡木杯閒
從今高卧雙松底便是淵明嬾出關

壽丘閣老先生

官居鼎鼐抵如貧贏得聲名動紫宸一代文章歸館閣
三千禮樂化成均壯年報國丹心在老去憂民白髮新
試問開元到今日匹休房杜有何人

和陳大理麻姑韻

白墮年來善竊名
灤西珍重灤東輕
富人只解藏千斛
靈藥何曾斬一莖
知為老生虛左席
尚留餘瀝在空罌
明朝雪滿長安道
不惜衝泥問麴生

昨汝礪選部傳示麻姑之作深以不與此會為恨
及見汝礪乃云疇昔之夜所飲多蘇酒後出麻姑

數杯真偽未可知疑以予故而有所吝且盤餐又
皆全卿餽餘殊無主客禮以是枵腹東歸作惡者
兩日予亟欲索飲為二家分別是非又以祈雪在
齋居中因次前韻簡成甫併全卿庶來日續前盟
以雪厚誣無謂
我為惡客也

飲陳大理麻姑戲用前韻奉謝

夜來惡客已除名從此西人不敢輕細斫江魚成雪膾
旋燒野菜帶霜莖燭殘逗遛須明月餅罄搜尋倒別罌
公子乘閒能過我濁醪許借有隣生

齊魯觀風送熊繡衣

百里孤城海岱中，驚車隨處問民風。東看蜃氣朝成市，

西望天門。

太山有東西二天門

暮倚空仲父塚，前春草綠齊桓祠。

下野花紅如何，今日營丘裏村社人多拜蓋公。

送李宗淵南還

文采風流阮步兵，窮途猶負少年英。詩因失意長懷憤，
客未深知嬾出迎。萬里空懷投筆嘆，一時誰識棄繻生。
醉邊離恨都消盡，又聽鶯啼四五聲。

送華文光下第南還

上林花木亂紛披正是東風力軟時
羣蝶漫教爭落絮
靈鳥直欲占全枝側身歸去何妨遠
整翮重來未當遲
萬里雲霄須自惜
弋人誰識羽毛奇

壽維之父母

人間何處近蓬瀛
滄海東頭第一城
門外碧桃花未老
庭前丹桂子初生
兩迴甲子從頭數
重受官銜徹底清
白首相看無箇事
含飴日日有餘情

送李孟寅下第

長安已誤看花期千里鄉園有夢思貧乏故人同卧起
蕭條官道獨淒其雲飛每恨青山隔水涸長嫌畫舫遲
試問長年何日到芙蓉秋水未開時

題新會書屋圖

百尺江流浸白沙綠陰深處是誰家雨催春去少啼鳥
風送晚來多落花架上古書編甲乙筆頭新語帶烟霞
主人素有文園渴日日濃煎七碗茶

榆錢

紛紛榆莢送殘春
鶯眼成堆不濟貧
白屋漫飛寧有母
朱門雖入未通神
天生肉好周遭在地
作鑪錘鼓鑄新
祇恐貪夫看不破
對人猶自欲傾身

立夏日郊行約介夫先生不至

春光纔盡落花稀
追補春遊尚未遲
滿地綠陰如布席
撲人飛絮似撩詩
便先數日有何好
再後幾時無此奇
笑殺城東草玄者
獨眠高閣未曾知

送當塗張教諭子充表弟

中表文章百煉金逼人驚爾氣駸駸偶然名落書金榜
贏得官清比翰林伏櫪可能忘遠志短檠猶自識初心
明朝捧檄江城去采石磯邊水正深

送徐子仁

兩袖披披興浩然兒童多識是髯仙

子仁號

搜竒二酉雲

生履覽勝三江月滿船無處不為詩債苦有時還向酒
家眠到頭懷土心難遣此日登樓憶仲宣

送李希賢浙江提學

十年高卧玉堂寒今日方辭首宿盤冠似惠文非法吏
職居廉訪却儒官芙蓉江上迎旌節鷹隼秋深振羽翰
便道過家無百里重闌尤喜問平安

觀國趨庭送介夫乃弟

誰似君家父子賢一門圭組自相傳過庭便可詢竒字
侍寢猶能問太玄紅日舉頭天尺五白雲回首路三千
伯兄此別應多恨夢裏何時見惠連

送吳先生恕

落木蕭蕭動客情
寒砧又起助秋聲
逐南飛鴈過江去
望北固山驅馬行
贈別詩多囊索重
關心事少往來輕
到家松菊渾無恙
稚子牽衣一笑迎

送李子陽歸省

自將心事奏楓宸
不比尋常愛乞身
清夜偶成炊臼夢
白頭還憶倚閭人
旌旗壓捺潮聲小
樽酒招呼月色新
問罷起居還就道
東風莫戀碧山春

送張朝敬下第

春闈漫說得人多麟鳳依然漏網羅天與奇毛終奮迅
我憐逸足暫蹉跎思鱸莫認為張翰抱璞誰知是卞和
明日西風江上路芙蓉花影蕩秋波

送張大尹

青山重疊護城樓城下人家瞰碧流地盡畊桑民尚困
境多盜賊吏多愁分符未報三年政捧檄先懷百里憂
為問袁公何德化至今血食未曾休

送劉衡仲宰濬縣

此地曾迴墨子車君行切莫更躊躇舊時風俗多酣酒
今日人家半讀書野外勸畊春雨足簾前聽訟曉星疏
嚴君治縣應留譜善政先看視篆初

送李德馨司訓饒州

白也詩豪復酒豪雲孫今日更風騷朝成百韻才猶鬱
暮飲千觚興轉高祿可代畊寧怨薄職當授業敢言勞
秋風彭蠡洲前醉筆底翻翻滾翠濤

賀屠冢宰乃翁封少保

垂垂白髮碧方瞳五見封章到浙東今日海濱無二老
古來林下少三公康強疑是神仙侶寬厚猶存長者風
莫道松牕真遜世權衡人物是誰功

送西安太守

報政歸來五馬閒停車隨處看青山舊聞民瘼還重問
新賦詩篇不再刪風送虎符歸少華雨隨熊軾過潼關
趙張已去三王遠合置君侯伯仲間

長春軒

四時花木繞欄杆倚杖朝朝帶笑看樹底清風能却暑
牀頭新酒可祛寒地偏客少門長閉老去心閒夢自安
睡起不知天早晚碧牕紅日正三竿

壽秦汝厲父

當門喬木碧千尋一卷先天萬古心設帳馬融無伎樂
傳經劉向在山林堂前弧矢春生影花底壺觴夕借陰
千里鳳雛來獻壽居家何必積黃金

重九前一日同王地官德華過袁太守山莊

匹馬來遊五柳莊主人渾不似柴桑指天論事知多憤
擊鉢催詩覺太忙丹藥未成留宿火菊花將發待重陽
醉中激烈歌聲起不放行雲過短牆

游功德寺次朝文韻二首

登高俯視亂山低山勢如攢萬馬蹄石壁倒懸霄漢外
玉泉斜注寺橋西龍從千尺淵中卧僧向三叉路口迷
時有僧隨行誤引至西直門故云習習香風携滿袖却疑騎馬過蘇堤

野寺門前信馬過莫將塵土浣煙蘿雲蒙山頂晴猶雨

月浸潭心水不波青杏子垂珠蓓蕾紫藤花發錦曼陀
詩人興在留衣外石壁新題不厭多

用守溪韻送儉弟

布衣相見又空還好去留心几格間無月讀書方就寢
有詩題石始登山下帷董子寧思佚運甕陶公不愛閒
自恨青春皆浪過於今為爾惜紅顏

又用前韻寄三叔

曉入承明近午還未容高卧草堂間醉中病酒猶呼酒

夢裏登山始見山千古文章成底用百年冠蓋有誰閒
題詩再拜呈諸父始覺王濛益厚顏

惠卿惠詩次韻奉荅

綠陰庭院晝沈沈
啞咽蟬聲助苦吟
戰北夷吾非是怯
傳經劉向亦何心

惠卿秋闈不捷
設帳授徒故云

燈前羣從能分韻
眼

底誰人利斷金
莫怪秋來少飛鴈
長安西去塞雲深

山癯為張信卿作用廉伯先生韻

宦途誰憶北山薇
今日君知昨日非
憂在江湖人合瘦

戰殘聲利體應肥
饑腸滿貯三千卷
空谷偏宜百結衣
門外落花深一尺
漫憑詩酒解愁圍

送仲惟馨

東風捲地落花殘
倦鳥應知息羽翰
春雨足時初試展
青山好處一憑闌
藥籠舊蓄三年艾
金鼎新成九轉丹
醫國醫民心未已
可能高枕卧江干

賀陳方伯生子

六十年餘始弄璋
熊羆先已兆禎祥
高門蓬矢春生影

老蚌明珠夜吐光
別鵠暗憐商穆子
傳家翻笑蔡中郎
從知爪齧宜秋圃
清露灑灑百尺長

樂漁為李汝璧乃翁賦

百尺清流遶碧岑
黃塘遺老興何深
棹歌聲落紅蓮渚
蓬屋詩成古柳陰
剖粒自當輕萬戶
一絲終不換千金
騎鯨本是公家事
莫道漁翁祇姓任

送將樂李大尹熙考滿還任

分符遠在劍溪旁
薦疏嘗聞奏建章
令尹每稱民樸魯

閭閻惟說吏循良
桑枝帶雨村村綠
麥穗連雲處處黃
歸向石頭城下過
還將治績報高堂

寒夜獨坐用前韻

床頭酒熟不須賒
牆外簫聲隔幾家
簷溜漸冰疑作柱
燈光無焰未成花
雪山尚記形如舊
月殿平看影欲斜
吟退筆尖髯凍折
要將冷澹向誰誇

贊皇凌訓導書至感嘆有作

寒燈寂寞夜窓虛
誰信官居似客居
俸薄未能供伏臘

道存應不廢詩書燕山北去梅花少易水西來鴈影疎
莫道玉堂霄漢上故人無力薦相如

雙龍道院

雙溪曲繞雙峰下翠碧空涵老子宮朝斗壇開雲起處
步虛人在月明中石門夜濕莓苔雨蘿磴秋生劍履風
習靜每來依道侶卜隣非為道相同

立春後二日通宵不寐天明乃夢到家

平生性懶長貪睡何事春宵睡未濃作意不看殘夜月

清心又聽五更鐘夜無好夢隨雙蝶眉有閒愁蹙兩峰
合眼朝來到鄉社滿溪春草綠茸茸

請同年諸公過院中齋宿

玉堂近在鳳樓東長見文光駕綵虹中夜不妨迎勅使
故人尤便遞詩筒向陽樹得春光早臨水牕涵日影紅
何事欲居蕭寺裏撞鐘擊鼓聽談空

元宵三首

天上今宵月色多人間到處有笙歌寶燈燦爛成銀樹

星斗分明落絳河萬歲山前仙掌動
百花香裏輦塵過
教坊音樂應無數
獨有清平調是和

莫道君門萬里賒
君心如燭照民家
瑤笙夜啟千門月
火樹晴連萬井花
鳳闕上臨珠斗近
鰲峰高礙彩雲斜
輕烟試看歸何處
化作天邊五色霞

華燈淡月鬪清光
玉漏遲遲夜正長
韶樂奏時雙鳳舞
輦塵生處百花香
綵山巧對龍樓外
仙掌平分御座旁
宴賞每懷憂惕在
宵衣傳授自先皇

聞命有喜

南北隨人有重輕出門何必問春明
莫言游宦非鄉土須識留都是帝京
色養少酬平日願官銜不減舊時清
三千里路看山去忘却乘舟觸熱行

渡口曉行

曉色蒼蒼暑氣平綠楊深處有人行
百年沙岸隨流徙五夜風帆趁月明
歸客未能離北土野禽先解學南聲
濁流到此應窮盡遙記清源是驛名

送沈壽卿

鄉園忽隔三年別京國俄成八月留夜雨牕前長對榻
秋風江上又同舟帶圍漸覺休文瘦時事新添季子愁
他日相逢定何處杏花紅滿曲江頭

過淮用渡口韻

雨收風定水波平畫檣雙敲自在行到處酒帘迎棹舞
幾船漁火隔江明峰頭柳亂旌旗影水底蛙喧鼓吹聲
屈指過淮今八度津人相見亦知名

挽徐德重

吳門昔有隱君子家住洞庭山上頭
詩律深嚴唐句法衣冠典雅晉風流
閒看白鹿眠深草時許沙鷗近釣舟
萬事從今總零落獨餘明月照荒丘

送徐州蘇指揮致仕

六十年來萬慮輕眼前無物更關情
碭山草綠春歸馬泗水風寒夜洗兵
野外懶窺烽火影帳前愁聽鼓鞀聲
獨懷聖主恩難報尺籍長留子姓名

送黃司空

昔年冀北公辭我今日江東我送公
報政豈應如許速
愛君曾有幾人同
山因剪伐材將竭
民為徵求力已窮
誰向九重陳至計
班行瞻望老司空

和西涯先生夜坐韻

玉堂深處不勝寒
彩筆新題暎雪看
有約買田來敝里
何時騎馬出長安
閉門自覺賓朋遠
倚杖猶稱拜起難
海內名山應有數
登臨高興未應闌

送沈克寅

我視尊翁作少年爾今頭角已嶄然讀書好破三千卷
時譽應歸尺五天萬里雲霄無弱羽一家衣鉢有真傳

從祖司空先生
弱冠登科故云自來建業由勤苦莫愛山窗日晏眠

七言絕句

元宵應制

鰲頭矗矗煙花裏鳳閣層層錦繡中月色總饒通夜白
燈光已占十分紅

雪霽雲開月色寒六街燈火萬人看檄書忽報將軍捷
夜奪崑崙第一關

送萬克修歸省

婺星錯落照慈闈趣此秋風月夜歸舊日斑衣猶在笥
一番起舞一光輝

含毫且勿賦秋聲共看新秋新月生一點清光雖似小
絕勝十五後來明

寄儉弟

露下空庭月滿除清宵憶弟意何如
天邊無數南來鴈
不為儂家帶一書

客牕聞雨

宦情羈思兩悠悠落葉寒聲戰暮秋
今夜蕭蕭牕外雨
無端添得許多愁

題王寶扇

寶有梅
花百咏

寒梅無意鬪春妍吟到逋翁覺已煩
誰道暗香疎影外
勞君又著五千言

寄李太守

仙翁長日愛彈碁敵手於今更有誰聞說西隣姚弋仲
未曾戰北氣先衰

送陸全卿巡按福建

問君頭上是何冠到處能令暑作寒只恐馬前霜易落
荔枝五月未成丹

方山四景

千株萬株山杏開無奈開時驟雨來半委泥沙半流水

山靈亦自為花哀

右杏林
春雨

暮門斜日對寒流一片雲凝萬古愁
泉底有人呼不覺

白衣蒼狗自悠悠

右覺渚
寒雲

粵王遺隴名猶在古木疎疎半已枯
每到月明霜滿地

直教啼殺樹頭烏

右粵隴
鳴烏

山作圍屏對面張疎林木未掛斜陽
王孫莫射西飛鶴

雲外仙人恐姓方

右方山
歸鶴

題畫二首

誰言高樹獨靡陰六月涼風自不禁相對可能無一語

含毫為調水龍吟

右哦松

遠汲清泉溉欲深童兒那識汝翁心虞廷六管終須備

不為春來十畝陰

右灌竹

待隱園次楊太宰韻

綠樹鶯啼春正深絮飛花落滿園林長松不改青青色
歲暮相看共此心

圍圍洋洋樂有餘誰言我獨不知魚縱教九島迴千里

那比江湖得自如

待隱園依北固山題名石在墨痕乾
何時布襪青鞋去
老眼摩挲試再看

芙蓉枝上露華清楊柳陰中獨自行
江上美人期未至
停歌不發更含情

洗竹從來為太繁獨留高節與人看
渭川空自誇千畝
爭似公家只數竿

一葉扁舟十幅蒲長竿短髮傍江湖
不知渺渺煙波裏

曾見逃名范蠡無

松間石上聽鳴泉清比琴聲更自然有客欲來醒俗耳
掛冠已約在明年

清風明月兩無求花逕柴門日轉幽莫怪主人歸較晚
君王有詔欲分猷

題扇寄徐文炯表姪

東風力軟落花輕一曲離歌客未行載酒滿船還載月
坐聽啼鳥溧陽城

題沈克寅扇

綠楊黃鳥試春聲
畫舫朱簾送客行
醉後不知君別去
醒來猶記溧陽城

明妃詞

西風冽冽塞雲愁
凍合長河水不流
只恐妾顏明日改
單于輕易犯邊州

玉顏一去黃金殿
香骨終埋白草原
千載遊魂歸不得
至今青塚尚含冤

宮詞二首

花影疎疎月影昏
沈沈魚鑰鎖重門
無端步下空階立
踏破蒼苔石上痕

清簾疎簾困日長
南風時送芰荷香
隔牕女伴來相約
同到池頭納晚涼

塞下曲

一聲畫角起邊愁
滿目黃雲暗戍樓
夜半將軍傳號令
明朝要斬郅支頭

邊城九月雪飛花
睥睨高寒集暮鴉
今日樓蘭猶未滅
沙場戰士莫思家

送三弟東歸

燈前相對一尊同
衰頰那知是酒紅
醉後已忘離別恨
樓頭又聽叫霜鴻

東籬秋菊試新黃
江岸蒹葭未著霜
路入故鄉三百里
遙看鴈影落橫塘

寄丁芝山

聞君脉理見秋毫袖裏咸陽術更高芝草滿山光曄曄
常分一葉惠兒曹

秋夜雨止風作

秋陰初散雨初晴颯颯西風夜有聲夢繞五雲溪上路
不知身在石頭城

紀夢

靈樵彫落已多時猶記當年澗壑姿昨夜夢中真想見
分明月影過南枝

大椿不駐八千秋空使孤兒日日愁
獨有當時枝上月
至今還照屋西頭

示驥兒

未嘗糠覈體何肥
空有便便腹十圍
但願吾兒勤苦學
何愁清瘦不勝衣

夢寐分明在碧山
澗泉深處洗塵顏
從來只說休官易
今日誰知退亦難

送沈四舅

花外鶯啼三兩聲
坐中有客不勝情
縱令花落春光老
猶向垂楊樹底行

雨中與沈克寅賞蓮二絕

紅蓮花映白蓮開
花影加入酒杯疑
是南威與西子
雙雙聯袂雨中來

西泚溪上萬花開
季子門前錦作堆
花笑主人何太俗
秋風將起未歸來

席上戲贈寫真龔士常

不寫褒公與鄂公却來吳下寫吳翁
衰容老眼都相似獨不能摸左耳聾

汪海雲為驂兒畫白雞鮮潔可愛戲題一絕

菊叢東畔石闌西素質天然不染泥
玉漏未殘天未曉莫教輕易草間啼

海雲又為駟兒寫赤雞形差小而有文復戲題一絕

絳幘低低距未長自知不入鬪雞場
宋公相對談玄處

應有旁人擬鳳凰

哭李充昭

虛堂落筆鬼神驚
生縛龍蛇卧素屏
莫怪遺文無諫草
白麻猶未拜延齡

題柳燕

深深庭院鎖春愁
盡日珠簾不上鉤
懶入茅簷定巢壘
暫時飛向柳枝頭

和國賢謝茶

雨坼靈芽我發船北風吹斷碧山煙一杯未解文園渴
七碗何能到玉川

品茶世獨推陽羨評水人多說慧山今日相從調衆口
莫教騰沸鼎鑪間

士修惠左傳一部已為峽水所壞後加裝潢又幾
為風雨所漂因成一絕

昔年沈沒黃牛峽今日漂零季子家左氏兩遭風雨厄
天公應是厭浮誇

秋江一棹

萬里長江一鏡平
空林落葉戰秋聲
孤舟不畏歸來晚
已見沙頭候火明


謝汝礪惠橘次韻

百顆勻圓遠寄將
青虬小卵半塗黃
詩人莫作多酸恨
採日應知未著霜

題猫捕蜻蜓圖

養得狸奴善匿形
閒來花外撲蜻蜓
不知黠鼠渾無忌

白晝徐徐出外庭



吳文肅摘稿卷二